

Messadi pertuccont revisiun parziala dalla lescha davart la dismessa da rumien dalla vischnaunca Ilanz/Glion

Preziau signur president dil parlament
Stimadas parlamentarias, stimai parlamentararis

Il november 2020 ha la vischnaunca tschentau quen per l'emprema gada la taxa da rumien communal sebasond sin la lescha da rumien, la quala il parlament communal ha approbau ils 18 da settember 2019 ed ei entrada en vigur igl 1. da schaner 2020. Cheutier ein diversas protestas vegnidas inoltradas. Cun il tractament da quellas protestas ei la suprastanza communal vegnida tier la conclusiun ch'entginas adattaziuns s'imponan, las qualas basegnan ina revisiun dalla lescha.

Explicaziuns tier ils artechels dalla lescha

Liberaziun dallas casas da vegls e da tgira: tenor dretg vertent ston ton las cussadentas ed ils cussadents che habiteschan stablamein ella vischnaunca (art. 19 al. 1 lit. b), sco era las casas da vegls e tgira sco menaschis el sector da sanadad (art. 19 al. 1 lit. d) pagar ina taxa da basa. La suprastanza communal ei dil meini che quei munta in buordi dubel e propona da liberar las casas da vegls e da tgira sco menaschis dalla taxa e da strihar corrispudentamein la menziun explicita.

Liberaziun da personas che vivan cumprovadamein e stablamein en in'instituziun ordeifer la vischnaunca dad Ilanz/Glion: Entgin(a)s pauc(a)s habitont(a)s dalla vischnaunca vivan en in asil ordeifer la vischnaunca. Personas che vivan stablamein p. ex. a Cuera en ina casa da vegls ni da dimora ni a Trun ella Casa Depuoz caschunan negin rumien ella vischnaunca dad Ilanz/Glion. Cunquei che quella clientella fa buca diever dall'infrastructura per il rumien publica dalla vischnaunca, eis ei endretg da liberar quellas personas dalla taxa da basa. Per motivs dalla trasparenza e suandabladad duei quell'excepciun vegnir menziunada explicitamein ella lescha.

Rom da taxas per corporaziuns da dretg public: art. 19 al. 1 lit. e prevesa che era las corporaziuns da dretg public sco l'administraziun cantunala, regiunala ni communal cun lur posts da survetsch, partiziuns d'administraziun scolas e dertgiras han da pagar la taxa da basa tenor unitad da menaschi separada, sch'ellas ein partgidas tenor liug. Egl art. 25 maunca denton in rom da taxas corrispudent, aschia che la taxa da basa sa buca vegnir incassada il mument dallas corporaziuns da dretg public. Quei vala ei d'aschuntar.

Revisiun parziala dalla lescha da rumien

Art. 19 Taxas da basa (midau)

¹...

- d. menaschis da loschament sco hotels, hotels-garni, hotels d'appartaments, hotels da club, menaschis da cura, pensiuns, ustrias, camonas, albierts da giuventetgna, albierts da tut gener per gruppas, casas da reconvalescenza, clinicas e semeglionts; menaschis da produenziun, commerci, mistregn, restauraziun e survetschs da tut gener sco interpresas da pendicularas, restaurants, caffetarias, conditorias, caffès, bars, dancings, locals da club, discotecas, survetschs da finanzas e d'assicuranzas, menaschis da taxi, kioscs, tancadis, biros da viadis, sco-

las da skis e da snowboard, scolas d'alpinists, purschiders d'activitads da sport e da temps liber, stizuns da victualias, menaschis dall'industria principala e secundara da construcziun, interpresas da schubergiar e semeglionts; menaschis da sanadad sco spitals, casas d'attempai e semeglionts; persunas cun activitad da gudogn independenta sco architects, inschigniers, miedis, advocats, notars, fiduziaris e semegliontas; persunas naturalas e giuridicas che meinnan ella vischnaunca luvratoris e/ni filialas ni agenturas ferton che la sedia principala sesanfla ordeifer vischnaunca; cun excepziun da claustras, asils, instituts e semegliont, els quals lur habitonts habiteschan stablamein;

Art. 21 Excepziuns e liberaziun dalla taxa da basa (midau)

...

³ Persunas che habiteschan cumprovadamein e stablamein ordeifer la vischnaunca llanz/Glion en in asil, en in institut ni semegliont, ein liberadas dalla taxa da rumien.

Art. 25 Rom dallas taxas da basa (midau)

¹ La taxa da basa per:

- a. proprietari d'immobillas importa denter 0.12 e 0.20 promils dalla valur dallas immobillas stimada dall'assicuranza da baghetgs. Il factur dil survetsch da rimnada munta per in transport da rumien jamnil ad 1.0 e per dus transports jamnils ad 1.5. Il factur da produenziun importa denter 0.0 ed 1.0;
- b. persunas che habiteschan ella vischnaunca e dimorants duront l'jamna che han cumpleni il 20avel onn da vegliadetgna importa 30 tochen 50 francs per persuna;
- c. proprietari, gudiders ed affittaders stabels da habitaziuns da vacanzas, casas da vacanzas e tegias importa denter 30 e 50 francs per object;
- d. menaschis tenor art. 19 lit. d importa 50 francs per menaschi plus denter 0.15 e 0.25 promils dalla summa da paga suttamessa all'AVS;
- e. corporaziuns da dretg public tenor art. 19 lit. e importa 50 francs per menaschi plus denter 0.15 e 0.25 promils dalla summa da paga suttamessa all'AVS.

Proposta

Sin fundament dallas explicaziuns precedentas fa la suprastanza communal la suandonta proposta al parlament communal:

- entrar ella fatschenta;
- approbar la revisiun parziala dalla lescha davart la dismessa da rumien dalla vischnaunca llanz/Glion.